



## Press Release

Ազգային Առաջնորդարան Ատրպատականի Հայոց Թեմի - Թաւրիզ  
Armenian Prelacy of Azarbaijan P.O.Box: 51355-4455 TABRIZ - AZARBAIJAN IRAN

E-mail: arajnordaran.tavriz@gmail.com Tel: +98 411 5553532 Fax: +98 411 5542304

### **ԱՏՐՊԱՏԱԿԱՆԻ ՎԱՆՔԵՐԻ ԾԱՐՏԱՐԱՊԵՏՆԵՐԸ ԱԶԳԱՅԻՆ ԱՌԱՋՆՈՐԴԱՐԱՆՈՒՄ**

**Թաւրիզ, Ազգային Առաջնորդարան** – Ս. Թադէի վանքի ուխտագնացութեան եւ այնտեղ կատարուելիք մշակութային ձեռնարկների առիթով, Ատրպատականի Հայոց Թեմի տարածքում գտնուող վանքերի եւ եկեղեցիների վերանորոգութեան մասնագետ ճարտարապետների հայ եւ օտար անձերից բաղկացած մի խումբ, այցելեց Ազգային Առաջնորդարան, Թաւրիզ:

Ատրպատականի Հայոց Թեմի Կաթողիկոսական Փոխանորդ՝ Գերպ. Գրիգոր Ծ. Վրդ. Չիֆթեանը երկուշաբթի 16 Յուլիս 2012-ին ընդունեց խմբին, որը առաջնորդում էր Իրանում եունեսքոյի եւ պետութեան կապ՝ Տիկ. Շեռլի Աւետեանը: Տիկ. Աւետեանի ներածական եւ խմբի աշխատանքների մասին ծանօթացման խօսքերից յետոյ, Կաթողիկոսական Փոխանորդը բարի գալուստ մաղթեց մասնագետների խմբին, որի մաս էին կազմում Հայաստանի պատմական յուշարձանները վերականգնող ճարտարապետների Հայկական Ընկերակցութեան անդամներ՝ Աշոտ Յակոբեանը, Սամել Այվազեանը, Վահագն Այվազեանը, Աշոտ Մանասեանը, Ամիրան Բաղիշեանը, Տիգրան Բաղիշեանը, Սուրեն Մելիք-Քարամեանը, Արտաւազդ Արզումանեանը, Վալերի Բալայեանը եւ Մանուշակ Դիդանեանը: Հայ Մշակոյթի Ոսումնասիրութեան եւ Վաւերագրումի Կենտրոնի նախագահ՝ Մինաս Լուռեանը, Միլանի Համալսարանէն՝ Ֆրանչեսքո Օկելլին, Վենետիկի ճարտ. Համալսարանի վերանորոգման ամպիոնի դասախօս՝ ճիորճիօ ճիանիկան եւ նախկին թաւրիզահայ ճարտարապետ՝ Վահէտ Մասիհիվարդանեանը:

Հիւրերին իր գնահատանքի խօսքը ուղղելով, Կաթողիկոսական Փոխանորդ Հայր Սուրբը յիշեց անցեալում նրանց կատարած աշխատանքը, եւ յոյս յայտնեց որ նոր թափով ու նոյն խանդավառութեամբ պիտի շարունակի գործակցութիւնը: Ան նաեւ ամփոփ տեղեկութիւններ փոխանցեց այցելուներին, Թեմի հայաթափուած տարբեր շրջաններում գտնուող եկեղեցիների ներկայ վիճակի մասին, շեշտելով անմիջական վերանորոգումներ կատարելու անհրաժեշտութիւնը:

Այնուհետ ներկաները հարցեր ուղղեցին Հայր Սուրբին, յատկապէս հեռաւոր շրջաններում գտնուող ազգային եկեղեցական կալւածների պահպանման մասին, որոնց նա տուեց սպառիչ պատասխաններ: